

Reglur um svæðafélög

I.

1. Svæðafélög eru svæðisbundin félög hundeigenda innan HRFÍ, sbr. 4. gr. laga HRFÍ. Þau vinna að markmiðum HRFÍ á ákveðnu landssvæði. Stjórn HRFÍ veitir heimild til stofnunar svæðafélags. Í nafni svæðafélags skal koma fram yfir hvaða landssvæði það nær og að um svæðafélag HRFÍ sé að ræða. Starfsemi svæðafélaga byggir á reglum þessum og þar sem við á reglum og tilmælum sem gefin eru út með heimild í lögum HRFÍ.

II. Markmið

2. Markmið svæðafélaga HRFÍ er að skapa hundum og hundaeigendum bestu hugsanlegu skilyrði með því að:
Vekja áhuga á og efla hreinræktun hunda sem fullnægja vel kröfum um andlegt og líkamlegt heilbrigði og þar sem við á um vinnueiginleika hunda. Upplýsa og miðla þekkingu á umhirðu, eðli og þörfum hunda í nútíma þjóðfélagi.
Fylgjast með og vinna að hagsmunamálum hundaeigenda almennt.
Stuðla að góðum samskiptum hundaeigenda og almennings.

III. Starfsemi

3. Til þess að ná fram markmiðum sínum skulu svæðafélög:
Kynna markmið og starfsemi HRFÍ og eigin félags.
Veita félögum í svæðafélaginu þjónustu og stuðning í hundamálum.
Skipuleggja eigin starfsemi í samráði við HRFÍ og taka þátt í starfsemi HRFÍ á svæðinu til eflingar ábyrgs hundahalds.
Vinna í samvinnu við stjórn HRFÍ að því að auðvelda samskipti hundaeigenda og stjórnvalda.
Taka þátt í og vinna að viðurkenndum sýningum og prófum HRFÍ.
Hvetja hundaeigendur og áhugafólk um hundahald til þátttöku í HRFÍ.

IV. Aðild

4. Félagi í HRFÍ sem býr á svæði svæðafélags getur orðið félagi í því. Aðild að svæðafélagi lýkur ef félagi óskar eftir því að ganga úr því, hann greiðir ekki félagsgjald á réttum tíma eða aganefnd HRFÍ hefur vísað honum úr félaginu.

V. Skipulag

5. Aðalfundur hefur æðsta vald í málefnum svæðafélaga, nema í þeim málum þar sem lögum HRFÍ skal beitt. Stjórn félagsins fer með málefni þess milli aðalfunda.
6. Á aðalfundi hefur hver skuldlaus félagi svæðafélags málfrelsi og atkvæðisrétt, sem ekki verður framseldur.

7. Aðalfund svæðafélaga skal halda fyrir marslok ár hvert. Fundarboð vegna aðalfundar skal birta með a.m.k. 14 daga fyrirvara í Sámi eða bréflega til skráðra félagsmanna. Stjórn svæðafélags boðar til fundarins.
8. Dagskrá aðalfundar skal vera sem hér segir:
 1. Kosning fundarstjóra og skipan ritara.
 2. Staðfesting kjörskrár og lögmæti fundarins kannað.
 3. Ákvörðun um fundarsetu og málfrelsi annarra en félaga skv. 10. grein.
 4. Ársreikningar og skýrsla stjórnar ásamt skýrslu endurskoðenda lagðir fram til staðfestingar og rekstraryfirlit frá áramótum til aðalfundar lagt fram.
 5. Kosning formanns, annarra stjórnarmanna og varamanna skv. 15. grein.
 6. Kosning endurskoðenda og varaendurskoðenda.
 7. Önnur mál sem stjórn svæðafélags hefur vísað til aðalfundar eða félagi hefur sent stjórninni til umfjöllunar á aðalfundi. Tilkynning um þess háttar mál skal vera skrifleg og hafa borist stjórninni í síðasta lagi tveimur vikum fyrir fundinn. Stjórnin skal skila umsögn um málið og tillögu um afgreiðslu.
9. Ef tillaga er lögð fram á aðalfundi um önnur mál sem ekki hafa verið kynnt svk. 8. tl. 8. greinar, getur fundurinn ákveðið að taka hana til umfjöllunar, en ekki til ákvörðunar.
10. Eftirfarandi einstaklingar eiga rétt til fundarsetu og málfrelsis á fundum svæðafélaga, en ekki atkvæðisrétt:
Stjórnarmaður og varamaður í stjórn HRFÍ.
Endurskoðandi kjörinn á aðalfundi svæðafélags.
Endurskoðandi HRFÍ.
Ef einhver ofanritaðra einstaklinga er félagi í svæðafélaginu gildir hið sama um hann og aðra félaga.
11. Stjórn svæðafélags getur boðað til félagsfundar telji hún ástæðu til þess. Félagsfund skal halda ef:
stjórn HRFÍ fer fram á það
endurskoðendur svæðafélags eða endurskoðandi HRFÍ fara fram á það
20% félagsmanna óskar þess.
12. Krafa um félagsfund skal vera skrifleg, henni beint til formanns svæðafélags og í henni skal greina frá efni og ástæðum fundarins. Félagsfundi skal halda innan 30 daga frá því að stjórninni barst krafa um hann. Stjórnin ákveður fundartíma og -stað.
Fundarboð vegna félagsfundar ásamt upplýsingum um þau mál sem eru á dagskrá skal birta með a.m.k. 14 daga fyrirvara í Sámi eða bréflega til skráðra félagsmanna. Stjórn svæðafélags boðar til fundarins. Ef stjórn heldur ekki fund skv. 11. og 12. gr. er stjórn H.R.F.Í. heimilt að boða hann.
13. Kjörskrá félagsfundar skal grundvalla á þeirri félagaskrá sem í gildi er á fundardaginn. Atkvæðagreiðsla fer fram með handauppréttingu. Við kosningar skal atkvæðagreiðsla vera skrifleg, fari einhver félagi fram á

það. Ef atkvæði eru jöfn í kosningu er varpað hlutkesti. Um ályktun fundarins ræður einfaldur meirihluti.

VI. Stjórn svæðafélags

14. Stjórn svæðafélags stjórnar rekstri þess á milli aðalfunda. Í stjórn sitja formaður og 4 stjórnarmenn.
15. Á stofnfundi skal kjósa formann til tveggja ára, tvo stjórnarmenn til eins árs, tvo stjórnarmenn til tveggja ára og varamann til eins árs. Síðan skal annað hvert ár kjósa á aðalfundi formann til tveggja ára, tvo stjórnarmenn til tveggja ára og varamann til eins árs. Endurkjör er leyfileg. Stjórnarmenn og varamenn má aðeins velja úr röðum félagsmanna. Ár er í þessu samhengi talið frá einum aðalfundi til þess næsta.
16. Formaður boðar til stjórnarfunda. Stjórnin skal koma saman a.m.k. fjórum sinnum á ári. Á stjórnarfundum skal færa fundargerð. Stjórnarfundur er ályktunarbær þegar a.m.k. þrjú stjórnarmenn eru mættir. Um ályktun stjórnar ræður einfaldur meirihluti. Við jöfn atkvæði ræður atkvæði formanns úrslitum.
17. Stjórn svæðafélags skal, auk þess sem lög HRFÍ eða reglur þessar kveða á um:
 1. Kjósa varaformann, gjaldkera og ritara, heimilt er að kjósa gjaldkera úr eigin hópi eða utan stjórnar og á hann þá seturétt á fundum með málfrelsi og tillögurétt.
 2. Undirbúa mál sem tekin eru fyrir á aðalfundi.
 3. Hrinda ákvörðunum aðalfundar í framkvæmd.
 4. Bera ábyrgð á eignum svæðafélags.
 5. Skila staðfestum ársreikningum og skýrslu stjórnar til HRFÍ strax að loknum aðalfundi svæðafélags og eigi síðar en mánuði eftir aðalfund, sbr. 20. grein.
 6. Skila umsögn um mál sem stjórn HRFÍ felur svæðafélaginu.
 7. Upplýsa stjórn HRFÍ um stærri fjárskuldbindingar og önnur meiriháttar mál á vegum svæðafélags.
 8. Að sjá um málefni svæðafélags að öðru leyti.
18. Stjórn svæðafélags getur skipað nefndir og vinnuhópa úr hópi félagsmanna til þess að sjá um ákveðin mál.
19. Stjórnir HRFÍ og svæðafélaga geta gert með sér samninga til viðbótar við reglur þessar t.d. hvað snertir aðra tekjustofna en hlutdeild í félagsgjöldum HRFÍ og ábyrgð á annarri starfsemi á svæðum.
20. Stjórn svæðafélags skal í síðasta lagi mánuði eftir stjórnarkjör, tilkynna stjórn HRFÍ um skipan stjórnar, helstu embætta utan hennar, starfsáætlun og fjárhagsáætlun.

VII. Fjárreiður

21. Félagi í svæðafélagi greiðir félagsgjald til HRFÍ sem sér um að koma hlut svæðafélagsins til þess innan 15 daga frá innheimtu gjaldsins.
Hlutdeild svæðafélags í félagsgjöldum HRFÍ skal vera 20% af grunnárgjaldi þeirra félagsmanna sem eru skráðir í svæðafélagið, samkvæmt skrá HRFÍ.
22. Bókhald svæðafélags skal gert upp árlega miðað við áramót. Starfs og reikningsár svæðafélags er almanaksárið.
Endurskoðandi kjörinn á aðalfundi skal yfirfara ársreikninga stjórnar hvert ár ásamt endurskoðanda HRFÍ. Stjórn svæðafélags skal hafa borist skýrsla endurskoðenda fyrir aðalfund svæðafélags.

VIII. Félagsslit

23. Svæðafélag getur sótt um það til stjórnar HRFÍ að vera lagt niður. Slíka umsókn þarf að samþykkja á aðalfundi svæðafélags með 3/4 hlutum greiddra atkvæða. Stjórn HRFÍ tekur ákvörðun um hvort svæðafélag verði lagt niður.
24. Stjórn HRFÍ getur ákveðið að leggja svæðafélag niður:
Ef það er óstarfhæft vegna lítillar virkni eða of fárra félaga.
Ef það hefur valdið HRFÍ eða öðru svæðafélagi alvarlegu tjóni með gerðum sínum að mati aganefndar félagsins.
Ef það hefur ekki staðið við skyldur sínar samkvæmt lögum HRFÍ eða reglum þessum.
Áður en stjórn HRFÍ tekur ákvörðun um að leggja niður svæðafélag, skal stjórn þess fá tækifæri til að tjá sig um málið. Í stað þess að leggja félagið niður getur stjórn HRFÍ ákveðið að efna til stjóranrkosninga í félaginu og skal þá kjósa stjórn eins og um stofnfund væri að ræða, sbr. 15.gr.
25. Þegar svæðafélag er lagt niður falla eignir og gögn þess til HRFÍ.
26. Reglugerð þessi tekur gildi nú þegar.

Reykjavík, 23. mars, 1994.